

Sov'nances.

« Li tîmps ni r'vint jamais su sès pas èt lès vîyès lunes, on côp qu'èle sont distindûwes, ni s' ralumenut jamais. »

Et c'est po ça qu'èle è-st-èvôye.

Elle è-st-èvôye, li p'tite bauchèle qui s'rafieûve di v'nu d'mèrer dilé s' pârin èt s' mârine tîmps dès condjîs : èlle ènn'èsteûve si byin binauje!

Elle è-st-èvôye, li p'tite bauchèle, ascropûwe dins lès yèbes, qui kèkieûve on pourcia-d'-têre oubin disvôyî one quèwéye di copiches tant qui s' pârin fouyeûve si corti.

Elle è-st-èvôye, lèye qui s' rèssèreûve dins l' cayute do tènîs' do vwèsin tot fiant chonance d'yèsse one djon.ne comére à s' mwin.nadje ou qu'avancicheûve pate-à-pate dins li p'tit bwès qu'il î fieûve sipès, astok dèl maujone, tot sondjant qu' li r'naud èt l' leup dèl fauve sèrin.n' quéquefiye catchîs padrî on' aube.

Oyi, èlle è-st-èvôye li p'tite bauchèle, achîde à prandjêre dins l' fauteul do mitan, ètur pârin èt mârine, po choûter li fouyeton au posse, oubin coûtchîye dins s' lét, ratindant qu'i fyîche nwâr po veûy li p'tite Sinte Viêje lumer su l' drèsse - sûr on mirauke!

Elle è-st-èvôye, li cine qui riyeûve branmint, tot choûtant lès djins qui v'nin.n' dîre on p'tit bondjoû : i causin.n' tortos l' walon! Vwèsins, vîs mon.nonkes èt vîyès matantes, bin riv'nants èt todî gaîys – qu'i lî choneûve!

Ci p'tite bauchèle là ni vike pus qu' dins l' tièsse d'one vîye comére qui s' rissovint di tènawète do vî tîmps, li cia qu'on lome li bon vî tîmps pace qui c'èsteûve li tîmps d' l'inocince, dèl djon.nèsse èt dès binaméyès djins qui nos miloutin.n' s'i-gn-aveûve dandjî.

Nicole Rouchet.